



| |
|------|
| ル 5 |
| 3286 |
| 4 |



門 凡 5
3286
4

三河縣志卷之十三

人物志下

婦道陰柔而中正清淑之氣可以感鬼神而禪
風化故笄髮女士媲美冠裳雖棹楔未旌而義
悉所天茶甘如薺之操不可滅也他如四方君
子之至則曰寓賢橋可踰淮粵能遷罇潛德高
風班芭所必及矣至若方書小技亦可成名仙
釋靈踪皆能見道擇其正者以廣多聞志人物

下

和十八
八月十八日

三河縣志

三河縣志

卷之十三 人物

貞烈

元

張氏李讓妻年二十八孀居撫三幼子孝先繼先敬先俱成立年九十二卒有司題請旌表其門

明

王氏生員許科妻科故王氏葬畢自縊撫按各加優恤

劉氏生員陳如忠妻忠故劉氏誓絕飲食旬日餓死有司旌之

劉氏儒士金捷妻捷被盜殺氏方二十三歲二子俱在襁褓家貧氏躬織衽教子業儒後皆成立年八十卒撫按俱加獎恤

劉氏生員邢鉞妻鉞故氏年二十六歲懷孕七月生子士允殷勤撫育紡績度日教子成儒孀居四十餘年有司上其事於撫按旌表其門李氏儒士于得信妻夫故氏年方十九歲一子甫三週矢志守節教子業儒孀居四十餘年有

司重其節詳請旌之

劉氏興州後屯衛指揮僉事孫希伊妻夫故氏年二十三歲無子養一義女謝氏教習女工度日後謝長成杜寧聘爲室未幾寧亦早逝謝氏復歸劉氏母女相依足不踰戶有司嘉其苦志詳巡按旌其門

吳氏興州後屯衛千戶趙國楨妻夫故氏年二十歲堅志守節嘉靖年間流寇犯境吳氏被擄嚴拒不從寇強拽上馬滾下數次寇怒遂被殺

顏色如生

劉氏興州後屯衛百戶鄭一元妻夫故氏年二十七歲苦志守節生遺腹子名世臣教以儒業得襲祖職巡按旌表其第

丁氏王守時妻美丰姿村居家貧鄰人安文登百計求淫丁氏不從文登伺其夫外出夤夜強逼丁氏且喊且罵文登遂殺氏死事覺報官置文登於法旌其門

李氏增生劉餘慶妻海州知州劉瑞遠母也夫

亡三十年操節撫孤瑞遠登乙酉榜任海州偶
因廢租呈誤歸里氏卽令其恬退菽水不繼晏
如也

吳氏薊州吳宗仁女廩生喬檀繼室夫沒氏年
二十四歲夫前妻子陞甫七齡族長欺其孀寡
凌虐之甚欲填於井蓋逼嫁而利其產也氏死
不從後聞於官禁之乃免教子力學勤女紅以
佐束修陞以明經授州判氏孀居四十四年有
司請旌表之

忠守節撫其夫前妻所出子女與已出子女無
異教二子力學不怠勤紡績以資誦讀繼芳癸
酉舉人歷官同知應徵丙戌進士任知縣孀居
六十六年壽八十有七縣道重其苦節請旌表
之

貞節

劉氏增生趙映斗妻自二十二歲夫亡守節子
女俱無紡織度日足不踰閭三十餘年於康熙

十二年旌表

劉氏高維岳妻自二十八歲夫亡守節富室慕其賢淑頻通媒妁之言氏斷髮毀容誓死不移幾歷凶荒從無他志遺孤高耀甫一歲撫育成立孀居四十餘年於康熙十八年建坊旌表

邱氏生員張正芳妻十六于歸事舅姑以孝聞自二十四歲夫亡守節教子張宏道卓立成名賢聲較著於康熙十八年題請旌表

張氏年十六歸儒士曹持裕未一歲夫亡願以身殉姑勸而止甘貧守志事翁姑盡孝遭翁姑喪哀痛盡禮宗黨稱其節孝於康熙二十六年知縣彭鵬申狀題請建坊旌表

王氏廩生趙廷璧妻自二十四歲夫亡遺子文煜文煒尚在襁褓室如懸磬誓不改操勤女紅以教二子文煜入庠補廩娶媳馮氏無出文煒娶媳王氏生一子未幾兄弟相繼沒長媳馮自二十二歲孀居日夜紡績菽水無缺次媳王亦自二十二歲孀居饘飩不繼買餅奉姑姑媳三

人同撫幼子以延宗嗣幸入鬻序其姑守節六十五年壽八十九歲冰霜皎潔萃於一門雍正五年有司題請王氏馮氏王氏建三節婦坊以旌之

劉氏張瑞毓妻自二十三歲夫亡立志守節子女俱無矢志靡他敬事姑嫜克勤賢孝

朱氏監生俞從政妻自二十五歲夫亡立節紡績供姑勤儉成家訓子成立闔族尊卑一以謙

恭和睦相待從無間言

以上二名於乾隆二年旌表

王氏左爾端妻自二十七歲夫亡守節家貧奉養翁姑撫育遺腹孝長慈幼誠敬可風

左氏郝爾位妻自二十九歲夫亡守節事姑盡孝教子入泮治家克勤立志惟堅闔里敬之

傅氏生員劉永祚妻自二十二歲夫亡守節孝敬公姑訓子入泮端莊自處勤儉治家秉心堅潔節操可風

王氏劉守安妻自十九歲夫亡守節冰蘖自矢善事公姑朝夕無倦艱苦自守教子入泮治家

克儉立志數十年如一日也

楊氏李永鶴妻年十九夫亡矢志靡他孝事公姑夙夜匪懈撫育孤子教以成人貧寒艱苦勞瘁弗辭冰霜節操歷久彌堅

楊氏生員李永祺妻年二十夫亡事奉翁姑克全孝養鞠育遺腹得繼宗支子某名登黌序苦心懿行節孝可風

以上六人俱乾隆四年旌

王氏生員喬仲觀妻年二十一夫亡矢志堅貞公姑撫立繼嗣治家勤儉矢志堅貞

王氏生員胡丕基妻自二十七歲夫亡幾欲以身殉公姑力勸乃止家貧備歷艱辛孝事堂上克盡婦道教育幼孫入泮成名

于氏李應善妻自二十歲夫亡守節凜志秋霜敬養翁姑克誠克孝撫養曾孫教訓成人

康氏李永吉妻年二十四夫亡自矢冰霜始終不易孝事孀姑朝夕匪懈葬子撫媳自甘窮苦鞠育幼孫教以成立

赫氏周鼐新妻年二十九夫亡守志艱苦愈貞

奉事翁嫜孝敬無怠教育孤子訓誨有方以上五人

俱乾隆八年旌

丁氏楊永寧妻夫亡時氏年二十五歲甘心淡

泊立志堅貞朝夕敬事公姑孤亦成立姑常曰

吾子若在豈有過哉言已淚涔涔下

馬氏生員胡德基妻自二十八歲夫亡守節冰

霜自勵事公姑盡孝教孤子入泮鄉里咸敬服

之

馬氏侯令德妻自二十七歲夫亡守節矢志不

移祀夫先祖事亡如存撫養繼孫克成家道以上

三人乾隆十三年旌表

張氏雷時順妻自二十三歲夫亡守節秉志堅

貞奉養公姑祀先如存撫育孤子教以成立女

紅自給蔬食甘心者四十餘年

宛氏丁有名妻年二十二歲夫亡甘心耐苦志

凜冰霜事公姑盡孝教幼子有方白首完貞人

咸欽之以上二人皆乾隆十八年請旌

蔡氏高四妻其夫外出被鄰人白三乘醉調戲

遂羞忿自縊知縣熊繹祖置白三于法給匾額以慰貞烈

王氏生員李克捷妻年十五于歸十七歲生子而夫歿青年失偶矢志靡他撫子成人無忝婦道守節四十二年於乾隆二十三年督學給匾顏其門曰志盟金石

葛氏張朝貴妻守節三十二年學院給額清節維綱以獎之

王氏馬迥妻年二十四歲夫歿子生七月苦節守貞教子良圖讀書入泮學院給清節維綱匾額

岳氏芮大昌妻夫歿遺孤三歲青年矢志白首全貞學使給匾曰古栢凌寒

侯氏生員趙璧妻年二十四歲夫歿遺一子苦節守貞學院給荻畫冰心匾獎之

王氏武良寶妻于歸三載生一子夫歿苦志守節知縣陳景給松筠節操匾額

待旌

趙氏朱暉妻年未三十暉忽得不起疾氏焚香
籲天願以身代延醫診治無效日夜痛悼先夫
自縊知縣奚祿詔爲文祭之見畿輔通志

潘氏廩生盧倬祺繼妻侯氏倬祺子廩生斐偉
之妻也父子相繼沒潘氏年三十侯氏年十八
姑媳立誓守節艱苦備嘗相依二十餘年姑逝
侯氏哀號幾欲自盡鬻衣珥以備棺殮守志愈
堅至七十餘歲四壁蕭然並無子嗣徒以戀戀
慈姑甘受一生辛苦其貞節純孝足配古人

喬氏楊鳳儀妻年二十七夫亡止遺一女誓不
更嫁育女成立遂蓬首垢面紉衣糲食淒涼苦
節年逾七十

王氏廩生朱暉妻適十年而夫亡遺二子俱在
襁褓拊膺號泣誓以死殉親族勸慰防護甚密
氏乃長號曰不欲我隨夫地下者爲呱呱兩孤
耳若不奪我志願甘寂寞以撫育之勤織茹荼
歷四十餘年

盧氏歸朱曦十餘年而夫亡家貧無子苦心守

節三十餘年伶仃孤苦聞者嘆息而氏處之宴如

李氏史明揚妻夫沒紡織度日苦志愈貞三十餘年

程氏李鳳翔妻夫亡守節二十年

馬氏符良柱妻夫亡守節二十年

張氏李永清妻夫亡恭順儉勤教子成立守節二十二年

劉氏符思慶妻夫沒守節二十一年

李氏劉自良妻夫歿茹荼苦志訓子成立守節三十六年

蕭氏李玉良妻夫亡守節四十五年

李氏王夔英妻夫歿守節二十六年

符氏張希載妻夫亡奉養公姑教子成立守節一十八年

白氏鄭忠孝妻夫歿貧苦自甘教子成立守節一十八年

崔氏蔣天符妻夫亡撫孤矢志守節二十八年

李氏李本培妻夫亡侍奉公姑婦代子職守節三十五年

張氏王自成妻夫歿守節三十三年

張氏王毓瑚妻夫亡奉養公姑撫育孤子守節

三十四年

高氏何三妻夫亡孝事公姑守節二十年

薛氏趙五妻夫亡守節二十二年

李氏程大妻夫歿教子成立守節二十八年

王氏于之秀妻夫亡教子成名守節二十年

姜氏李邦科妻夫亡守節四十年

張氏王宏召妻夫亡孝養公姑守節四十二年

徐氏李天佑妻夫亡撫子成立守節一十七年

李氏秦大妻夫亡守節一十八年

石氏周大妻夫亡苦受饑寒訓子成立守節四

十年

張氏郭大妻夫亡孝事公姑守節二十三年

孫氏張大妻夫亡撫子成人守節二十三年

于氏李大妻夫亡守苦節四十一年

康氏李二妻夫亡守節二十一年

白氏孟萬盛妻夫亡奉養公姑守節一十六年

柴氏聶來良妻夫歿教子成立守節二十八年

張氏馬大妻夫亡孝公姑撫幼子守節三十年

周氏王受福妻夫亡守遺腹子夫節四十六年

劉氏陳大妻夫亡守節三十一年

皮氏劉大妻夫歿守節四十五年

李氏張大妻夫歿孝公姑撫幼子守節十七年

汪氏生員李茹蔚妻夫亡撫孤守節二十五年

安氏楊輔臣妻夫亡無嗣守節三十四年

侯氏生員王琦妻年二十一歲結褵未一年夫

故主侍翁姑教子入泮守節三十餘年乾隆廿七年旌

陳氏生員周鑑妻年十八夫歿侍奉公姑撫養

嗣子一如已出守節三十八年

以上節婦俱行詳明尚未旌表

三河俗多好義雖顛顛布荆亦能慷慨捐生

或堅貞飲藁有奇男子風果皆地之靈歟抑德

化成之也然或業已邀旌或現在待旌或窮鄉

下戶奇節終身而歿歿者不可勝計今就其表
著者志之外有苦節核實無訛者隨報隨誌雖
未旌而勸亦在是矣

僑寓

皇清

周鴻儒河南人守備致仕僑寓三河某公贈以
詩有梅花談笑占盡春風之句可想見其為人
矣

劉子京薊州歲貢品行端方文詞卓越畿東名

宿首推第一

方技

皇清

盧裕楫友竹子工行書

李柱陞精楷書

董炳邑增生精古篆兼工畫供奉

內廷書篆館乾隆十四年十二月進

御製盛京賦篆體三十二類蒙

恩賜與繕印篆八千餘顆議敘選授四川潼川府經

歷

李洧柱陞姪工畫山水花卉今僑寓河南未

歸

明

雷應震精岐黃活人甚衆遠近德之

皇清

雷亮龍善醫術順治年間補太醫院醫官

仙釋

皇清

蓮如邑人受京都圓光寺法輪和尚戒卓錫

南關地藏庵法律謹嚴會通釋典雖寄跡空門而雅好翰墨諸生樂與之遊

禿和向不知何許人卓錫於丞相莊之通濟寺莫識其年歲常見肌體如童冬夏一衲寒暑不侵樂與稚子嬉遊客至相訪時出詼諧間多奇驗所得錢米旋散貧民未嘗入橐先期示寂端坐而化

論曰君子功施社稷學備古今俎豆鄉賢固間

世而一出者也三河山高水長靈秀所鍾賢才輩出上下數百年間人物已畧見於此矣自茲以往沐浴

化涵濡日久其聯翩競爽者宜更何如輝映也

三河縣志卷之十四

雜識志

紀雜事於志乘之末其信者可以證史冊其疑者亦可以裨見聞蓋軼事遺言往往得之故老之傳聞裨乘之記載與夫文人學士燕談語錄叢說雜抄事類紛繁難以條品薈而萃之而邑中零雜之數亦畧盡矣志雜識

撫言

五代史後唐趙德鈞幽州人有權畧從劉守光

為軍校唐莊宗遣大將周德威攻拔蘆臺軍克
燕城執守光以歸德鈞因歸莊宗同光中以德
鈞鎮蘆臺明宗長興三年領幽州節度使十年
契丹來侵德鈞擊却之執其將赫邈乃城三河
以戍之以通薊州運路

長安客話

元丞相脫脫將赴三河陛辭元主賜
宴至夜分脫脫起曰臣明日早行矣半醉半醒
過半夜元主笑曰卿明日行不必早三更三點
到三河脫脫叩首謝君臣盡歡而罷

燕山叢錄

元至元十六年太乙居臨洶

注云太乙所居

其地必昌

易乾鑿度曰太乙取其數以行九宮以制

九野其一為天蓬以制冀州之野其餘天內天
衝天輔天禽天心天柱天任天英其應在荆在
青在徐在豫在雍在梁在揚在齊也所謂太乙
亦惟天蓬之一星乎

夏店水月禪林有貝勒壁記曰白衣菴者奉觀
音之古刹也額題水月禪林當巨鎮之衝無泉
石之蹟院宇清幽勝峙一方余奉祀

東陵而獲遊覽焉瞻仰之頃想見昔人建名殆有深義
因曰白衣莊嚴乃

大士如然之體水月喻相亦慈悲自在之真水月
禪林之名其斯之謂歟或曰未然也余曰梵刹
叢林充建寰宇水月之名半居泉石茲市廛之
間得無左乎或曰不然子不聞千江有月千江
現雲在青天月在瓶之偈乎圓妙慈光無地不
照清涼法乳何物不沾一念之真卽爲淨域奚
喧靜之分執着乃爾哉况此刹當通衢市鎮之

間具塵外幽閒之賞松槐映月以交輝鈴磬因
風而流響活火烹茶不必遇趙州而解渴長途
暫息奚啻接蓮社之餘芳至若和春嘉卉長夏
涼風玉宇清霜茅簷煖旭羈於宦情者至此塵
鞅頓解疲於行役者更復甘露親嘗復何論山
林廛市水耶月耶豈拘定體千手耶白衣耶焉
有定形余曰噫嘻旨哉斯言也因喜起以作歌
曰靈境幽棲本在山闌闌塵中焉容此乃云禪
性本清明月耶水耶堪喻比長途日日幾經營

月有盈虧水亦爾水月無心迥無塵總之虛靈

亦如此但願過客常惺惺水邊月下心田洗拂

盡塵襟揮毫落紙水月禪心以付衲子後跋向

因留宿此廟興發騁懷隨就短章不計工拙今

寺僧乞錄以為禪林潤色之助余是以為書之

昔雍正歲次乙卯夏五月也有圖章 堂及字

此記未刻而禪悅之味溢于幅間錄之以誌招提勝事

舊志石城山因上有石城故名水經註石城以

水出西南石城山東流逕石城縣故城南北屈

逕白狼山然則石城本縣名也通鑑晉紀慕容

寶宿廣都清河王會勒兵攻寶寶帥輕騎馳二

百里至龍城會追至石城不及是廣都去龍城

二百里而石城在其中間也慕容熙敗於北原

石城令高和與尚方兵作亂註云高和本為石

城令時有事會于龍城是石城去龍城不遠也

潞水客談明初設興州營州二衛於通州之三

河縣

通州志順治五年以興州後屯營州後屯隸通

州左衛康熙十二年兵科余司仁請裁無益衛官以節國用以興營二衛歸併三河縣

屯政考三河有曠土可屯通州右衛八屯三河之葛中屯燕郊店隸焉

道園學古錄普安禪師至溫於三河縣作蓮宮寺

日下舊聞三河縣有延福寺見元崇國寺碑陰今在如口莊

五賢祠 在縣治西南祀明知縣楊蕃吳賢陳

阜漢孫廷相張仁祠久廢今祀名宦祠而五賢之名至今邑人士未能忘也

舊志明初制東察院在縣治東西察院在縣治西戶部分司在縣治東府館一所在縣治西遞運所在縣南關正德初併公樂夏店二驛為之遞運所在驛西今俱廢

紀事

燕山叢錄遼異僧洪源重熙間自穎州來於渠水陽建彌陀舍冥心入道忽一日跏坐化其徒

火之烈焰已絕色身如故乃作龕供佛側髮鬢
鬢長月一削之後有女子摩其頂髮遂不生

按渠水卽洵水也三國志遼西單于蹋頓強曹
公將征之鑿渠至呼沱入派名平鹵渠又從洵
河口鑿入潞河水經注亦引曹公從洵口鑿渠
以通河海然則縣因洵而得名渠亦因鑿洵而
得名故石趙置城名臨渠晉永和六年慕容儁
僭號前燕遣將慕容霸伐趙會於臨渠方輿紀
要以渠河爲洵河之譌非也

銅鐵獅在縣門外實鑿石爲之不知始自何年
叩之鏗然有聲左音如鐵右音如銅

方輿紀要泥窪舖在縣西二十里有巡司明洪
武年間設關局於此後移於夏店去縣治三十
里有五槐公館又西四十里曰烟郊與通州接
界有官兵戍守

燕山叢說華山明宣德中設石廠宣宗三年建
錯橋於華山石廠取石修砌

舊志三河墩堡共十六處石碑段家嶺白浮圖

夏店柳河屯馬起乏外尚有新店墩泥窪鋪墩
 英城堡陟山堡中橋堡龐里山堡堞軍山堡夏
 店堡拷佬山堡南石渠堡彭中丞宰洵日於五
 百九十三莊內設守望樓八百零七處亦相友
 相助之意也

石和尚在永濟橋西面鑿石為僧形高一尺許
 西向相傳昔時紅娘子屢為水患製此以鎮河
 水宴安故俗呼洵河為紅娘子港

餘序錄永樂二十三年興州左屯衛軍徐翼

有子自宮入為內豎翼奏乞除軍籍上曰為父
 當教子為子當養親爾有子不能教自殘其體
 背親恩絕人道敗壞風化皆原於爾出其子使
 代軍役

連山碑在焦園山無梁閣後就巖石而鑄成碑

舊志明設御馬監內監掌之公廨墻垣皆極宏

麗又有南北馬房兒東馬房在縣北二十二里
 兒西馬房在縣西北二十五里為南馬房楊家
 橋馬房在縣北四十三里官莊馬房在縣東北

四十五里張各莊馬房在縣西北四十五里爲
北馬房又有牧馬草場地至

國朝康熙十八年地震公廨墻垣無存

目下舊聞崇禎十五年四月順天三河縣境內
忽於空中墮一龍牛頭而蛇身有角有鱗宛轉
叫號於沙土中以水沃之則稍止有司不敢上
聞如是者三晝夜乃死事見烈皇小識

畿輔通志

郭鎮雄縣人萬歷舉人授臨洺縣令
值旱蝗鎮禳之忽大鳥羣飛吞蝗吐於水者三

口人以爲異聞父病乞歸不待授代封印而去
轉脚碑在河北馬房古廟內因康熙十八年地
震撼動轉向而不仆

三河縣志卷之十五

藝文志上

歷代名賢紀載皆經術政治之篇故夫風俗之盛衰治理之得失山川之險易古蹟之貽留胥於文人腕下傳之循覽遺文而興利除弊釐然可法矣下及詩歌有韻之文或咏山川或題名勝廣爲蒐採以資諷誦亦可覘一邑人文之盛焉志藝文上

碑記



元

上

大成至聖文宣王尊號碑

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承丕緒敬仰休風循治世之良規舉追封之盛典加號

大成至聖文宣王遣使闕里祀以太牢於戲父子之親君臣之義永惟聖教之尊天地之大日月之

明奚罄名言之妙尚資神化祚我皇元主者施行

泰定元年三月

日立

翰林侍讀學士中大夫知誥詔同修國史臣李

深道書承直郎大都路通州達爾花赤兼管本

州諸年奧魯勸農事臣速朗吉大篆額

重建三河講堂記

王約

禮部侍郎田君嘉甫告予曰吾邑三河始城於後唐明宗長興三年宣聖廟未詳其初而廟之

講堂乃金泰和五年蒲察公勅焉榜之曰明道
迄今將百年而摧圯無餘縣當京畿東道之衝
前尹數輩俱以供需故不暇計也合尹劉君鐸
自元貞二年宰是邑利興害革巨細畢周一日
謂僚屬曰田闢訟簡賦均盜息政之常也學校
不舉政之大疵乃密與邑之望六七人協義籌
度卽明道故基而爲堂費不擾民而厥績告成
旋以病卒適瓜代日也噫尹來甫三載上官稱
其敏黎庶享其惠胥吏服其明邑民思尹不已
欲仍是堂以誌甘棠之愛何如余曰縣階末也
尹秩卑也然承流宣化移風易俗實本於此今
之治縣者例以督責聚斂爲先期會奔走爲急
故狼戾者蚩緣以侵漁庸瑣者依違而取給名
曰牧民而實爲民蠹求其所謂庶之富之者不
可得况教之哉劉尹之治可謂旣富之而又有
教之志矣乃志未酬而身殞哀哉繼爲政者苟
能遵其已成而遂其未成尹雖死無憾也尹沒
矣民猶念之於以見尹之得民者厚民之奉尹

三河縣志 卷一五
者誠誌諸金石乃邑之光衆之馨後之鑑也云
胡不可田君曰余所言者尹之績子所云者尹
之志語有之言以足志文以足言不言誰知其
志子能言矣請書之以畀邑人余曰諾

三河縣學刱建兩廡記

祝阿

尊孔子而配以四子十哲并祀七十子先儒於
兩廡薄海內外莫或異焉凡以隆洙泗之傳廣
化育之教也我朝開闢之初首命內外郡邑各
建廟學其崇儒重道之心一唐虞三代之心也

洵陽當衝道絃誦茂聞禮樂弗振泮宮僅蔽風
日而兩廡俱闕殊乏從祀之儀至正戊子教諭
劉元皓由平谷秩滿調是邑怒焉傷之卽白于
縣之令佐刱建兩廡六間兩齋二間計已束修
及官吏捐俸里閭助費工趨事集不數月而成
舍爰命丹青繪十哲以下封侯者儀容分爲兩
廊黻冕之制燦然有章邑之耆舊邢謙儒士王
國佐請余爲記以刻石余維文翁治蜀興舉學
校西土號爲儒雅昌黎守湖設立師教南川稱

爲易治洵陽兩廡之建俾邑人知道統之流傳
經學之昌明聖天子興賢育才之至意何莫非
教諭劉公作新之力歟因敘其實以爲記

明

三河縣新建洵河石橋記

楊一清

三河縣城南百餘步有河卽古洵河也東通鉅
橋西達金鷄塘接境通薊爲畿東要路衛縣歲
修浮橋以渡水溢橋輒壞僉謂必建石橋而工
役浩重莫之敢舉今提督東廠御馬監張公銳

邑人也謀於其兄後軍都督張公明迺姪都督
同知張君蘭捐白金數千兩鳩工建橋屬大同
指揮趙昶董其事伐石惟堅選材孔良四址並
築各甃以石厰爲洞垂爲虹鋪爲面躡爲數長
可三十步高五尺廣若干尺以正德十年十月
告成環而望之力將岸爭勢與空鬪勇若鰲戴
轟若嶽壓風不能撼雨不能蝕夏不苦溢冬不
病涉僉曰張公之惠也於是提督守備三河崔
昂知縣郭寅謂不可無文以紀之乃龔貞石具

事由遣邑庠生石文明詣京師請余爲記余維橋以利涉有司之常職耳顧以鄭僑之賢而徒杠輿梁之政尚多缺畧安論其餘錦衣公都督君之協心殫力共圖其成其宅心可謂厚矣卽是以觀而凡利民惠物之念安往而不然哉故樂爲之言且以告夫後之有官守而志及民者併三河驛記 李 貢

三河縣東有驛曰公樂西有驛曰夏店皆去縣二十里使者東西至以驛在野且隘恒不止宿必抵縣以息用是巡撫平湖屠公勲請併於縣爲三河驛爲衆議所格正德辛未貢檢舊牘得公疏嘆曰此非節財裕民之大者歟疏入報可會邑人爭請運二驛舊材併作而王守備玉巖任知縣濟崔指揮昂疏請成之縣釋重累爰刻石以銘曰漁陽之西潞河之東有三河縣界乎其中使者不留必縣是止前賢謀國節財裕人并二爲一道里亦均我聞于朝天子曰可經之營之有堂有厦昔者候吏輟食而嘆今領於驛

寧其室家昔者邑民苦于帳具今領於縣有害
斯去事雖由我恐蔽前賢刻銘于石冀永歲年

重修關帝廟記

朱崇儒

古云正直惟神以其英靈精爽觸卽通感輒應
受命如響而護國庇民萬世永賴故禋祀亦萬
世弗衰伏稽

關帝之神其精忠大義勁操直節光昭史冊迄今
凜凜猶有生氣萬世而下仰威靈蒙覆庇其建
廟崇祀者何代無之何地無之洵陽城東隅舊

有

關聖廟一座規模狹隘且多傾圮善人楊致和西
晉人李宗先等公秉誠虔捐貲鳩葺而住持僧
永亮復勸鄉人共成善事修建正殿三楹馬殿
山門亦各三楹簷廊棟宇煥然聿新豈復昔日
之廟貌觀瞻已哉而廟西復買閑房一所修經
堂佛堂僧房各三禮神者忘昔之狹隘而咸樂
今之寬廣是豈作無益崇淫祀者比一帝之威
靈有以感人心而致其誠悅也予素仰神之正

欽神之靈爰摘俚語以記歲月云

重修三河學記

朱國俊 邑人

洵列畿左沐右文之化率先風勵凡關儒政者
旣嚴且潔而殿堂門廡罔不宏整視他有加焉
其後吏治因循士習日偷萬歷後學宮頽廢僅
蔽風雨迨近年戎馬生郊徵發日事士且釋俎
豆而事干戈養士之地幾成邱墟幸司訓杜先
生振鐸茲地一顧興嗟遂有維新之意但勢難
創舉而本學文昌閣尤傾圯不支先撤而建之

曲檻傑閣煥然改觀今春以固圉論功先生將
及瓜輒深念曰余懷此久矣詎可托之空言哉
亟請之邑侯裴公公躍然曰是予心也然非先
生無可屬者自先生始亦自先生終守土者藉
以襄此役其有辭於諸生矣於是先生竭蹶以
從量時度務鳩工庀材擇諸生老成敏幹德行
夙孚者田沂輩董其事七閱月而始成爲堂五
楹敬一亭三楹左右齋凡六楹東西耳房凡四
楹儲祭器備齋宿也下至門垣階砌甲於昔時

而精堅完緻則從來公家之役未有若此者矣
茲一舉也裴侯首出鍍金外則縣佐貳及縉紳
鄉貢暨士民捐助而先生竭力經營割清俸以
終其局尤人情所難也昔三川王侯繁允雅意
興作堂儲灰磚以供役而卒不就今役不及民
告成不日昔何以難今何以易故天下事有謂
不可爲者誣也爰据實而泐之石

重修洵河橋碑記

朱國俊

邑爲畿左名區山川迴合阻洵水而城每夏秋
霖雨吞吐諸壑離城咫尺至不通往來正德間
大璫張銳之兄張明首創茲橋於今百五十年
水波所齧輪蹄所踐砥石旣圯中空而裂居者
行者日牽車於泥淖浸淫之中蓋數十年矣歲
戊子邑侯孟公分符爲令政修事舉民咸和悅
乃倦念茲橋晉耆民劉承業王士奇而屬之佐
以清俸又誠之曰母易事母速成務堅且久以
旣厥功承命唯唯歸而庀材協謀各董其事公
時率邑尉斯公躬先督課始於庚寅之三月迄

六月凡工以萬計貨以千計灰瓦木石之屬以億計而後告成余因爲記又綴以銘銘曰有通者梁便行旅也有峻者基虞顛趾也撤而營之續遺績也載而履之擬虹駕也誰底厥成憑心匠也誰襄厥功合策力也維石磷磷象若功也維水湯湯漑厥澤也用告後人嗣而庸之永未文也

重修碧霞元君祠碑記

朱國俊

自泰山鼎立女主分靈元君之祠徧天下其像

凡五軀各有所司而擅宗祀職死生其大較也洵邑北關舊有神祠洊經兵火室宇蕩析香火寂然三韓孟公城守許公斯尉侯先後官茲土過是祠慨然曰是邦舊稱繁庶今凋瘵若此非獨歲之咎也或亦祝釐不謹神不饗其馨而鑿其褻也戶口有幾天扎時聞此非守土者之責而誰責耶遂捐資爲倡而邑之紳士樂輸恐後撤而新之歷年餘金碧燁煌屹然巨觀乃嗟我侯之用心深而諸公之能勦厥事也夫愚民無

知導之以惡則易迪之以善則難彼國法之章炳如星日而悍者梗焉閔不知畏至語之以幽冥神鬼之事則靡有不怵然若驚聖人以神道設教良有以也侯之於民既導之以顯又迪之以微易惡而善疾如影響亦足以見上之感人深而民之易爲善也侯以

內詔遷已五月猶惓惓是役復垂橐佐之囑斯公竣其事余故樂誌其始末以泐之石

明威將軍許公必昌德政碑記 朱國俊

許大將軍蒞洵幾七載法行而人肅惠行而人戴警絕在苻風清榮戟洵一時之偉望振古之奇人矣

廟堂稱其賢推轂擇帥將尉印以行其鈴下士感將軍之威惠咸欲叩

闕請留卒知不可乃表將軍夙昔德政撮其大者泐石以垂不朽余邑人也投劾以來習將軍之爲人蓋將軍家世詩書獨少有大志落落不偶遂投筆北上有定遠侯之志歷封疆多奇績其任

洵也適當極敝之後額兵單匱餉不以時而路
 當孔道傳送不暇故事日煩兵日弱將軍廉公
 有威凡重大之務以身肩之而分甘啣潤士皆
 宿飽投石超鉅較之他營不啻星淵此洵兵所
 為感之深而戀之至也余有事四方每見官其
 地者沒沒無所短長及其久也怏怏焉有怨其
 去之不速者將軍之行也人猶欲誌之不朽則
 其得人之深誠可槩見矣後之賢者能步其武
 庶相繼以有成乎

邑侯成公王臣德政碑記

楊正中

公中州望族也辛卯薦于鄉膺

命來治洵邑蒞任之始慨然嘆興茲邑地瘠民貧衝
 當孔道聞而識之者有年不謂凋瘵若此鄭監
 門應上圖者語於眾曰

國家興百利不如除一害蓋以利興弊將隨害除
 卽以利民也爰詢疾苦孰為亟僉謂車馬之在
 民者害百倍聞言悚息云驛傳車馬俱在官奉
 給已久三河彈丸之地去京師僅百里胡敢偏累吾

民收公廩民自是無鞭箠之苦德政一舊例社
撥一役催糧謂之原差歲更十有八役日至其
門而督之民供應不暇昔人所以有願捕蛇者
飭令停止民無追呼公輸更捷德政二向來收
糧公耗外復有私加忽抽查間有增重者笞之
自是親行兌閱蠲耗平收執衡者不得高下其
手德政三兩造質成素憾差拘私禁之弊動費
金帛痛加革除且涇渭既分人無冤滯獄稱平
允德政四日用所需時價公買役有虧其直者
重撻於市由是畏法貨殖得平德政五大車運
石於

皇陵石重千斤臨境至河天寒水冽御者恃

欽工索夫百餘挽車渡民皆膚冰股栗齒觸有聲問
不以畜而以人曰防水激也詰之畜貴於人乎
叱夫回力抗不應車卒自行德政六修葺

孔殿啟聖祠春秋享祀豐潔待師生以優禮德政七
市廛之地有架滿僕者聚夥奪人物急趨隘日
中幾罷市令差役巡緝扭責數次乃止商賈貿

易得安德政八至於門盤夜禁勸農化俗良法
難更僕數二年餘歲稔盜息含鼓耕鑿地不患
瘠民不憂貧差不苦衝熙熙太平景運何莫非
我公深仁厚澤之所被也邑人士有扶杖往聽
願觀化成之意爰勒諸石以誌不忘兼俟繼美
之觀法者

三河重修學宮記

任塾

余以甲寅仲秋蒞三河見城郭蕭殘廨宇圯壞
固已憂心如焚已次日謁

文中學見荒原上歸然若靈光餘明倫堂啟聖祠文昌
閣俱僅數椽漂搖于寒烟蔓草中亟進諸生問
焉云三河學宮故卑隘明正德年一修萬歷年
再修俱因陋就簡非有堅久之實迨邑遭兵燹
學宮一堵屢經廝養之毀竊以至於此余慨然
曰余之責也於是謀於官僚紳士集金若干不
足則有先人之遺畝命兒子鬻以助焉鳩工於
康熙十五年四月畢功於十七年八月其間有
因而無異於初者

先師殿是也有因而半於剏者啟聖祠明倫堂文昌閣是也有剏而無所於因者東西廡泮池戟門櫺星門鄉賢名宦祠及垣屏柵欄花樹之圃是也物易於市如其值人食於官如其功不請公帑一粟不徵里甲一丁而舊規頓復規模較益宏遠矣落成之日士持觴進曰是不可無記余曰曷記哉然此弦歌之地也故不揆鄙陋率賦長律以應且述營建之大畧云爾

三河縣學宮告成記

彭鵬

八閩彭鵬爲臨洵宰始至三日謁

先師廟漂搖孤支東西前後皆平蕪地詢之曰己未地大震也詢廢材曰久化爲薪矣何以無建豎曰衝疲也令涸鰓不自存退至署頽垣敗葦亦弗克寧居八月行了祭禮啟聖公無坐處無木主自四配十哲下皆裁紙糊廟壁鵬不自揣量拮据卒瘞先啟聖祠祠成次東西廡十楹經之營之二年而兩廡成伏讀陞學校以端士習喬

呈

其訓宰小臣也敢不勉旃初洵應童子試者不滿二十人惟師道之弗立黨庠之弗修脯資之弗辦故至此乃於啟聖祠東始立義學購田貳頃伍拾伍畝伍分以租供脩脯正供宰自辦董子曰正誼明道吏與儒當交易之而大成門闕焉戊辰十月

皇上駐蹕三邑蒙

召問賜金三百臣鵬九叩什襲將歸以脩先祠瑩念垂髫授書誦法孔子聖門報本之地也先分

賜金特建戟門三戟

君賜也戟門西祀鄉賢十一人構祠祀如初是年正月京兆許公頒發崇祀圖牌廣狹高下遵行如式二月行丁祭禮瞻仰稍寧此舉不行于募不出於贖募者釋子之持鉢也流於丐贖者長吏之飽橐也藉以攘攘與乞何可爲且洵人貧甚募者誰自反治洵無他能息訟寧人從無罰民一銖一紙豈以建學出諸贖貽聖賢羞乃次櫺星門次祠儀門次庠門次階次拜道次月臺次

泮池護欄磚之石之丹之黼之次第以成所未
遑者明倫堂進德修業兩齋竊有志焉以歲額
修整文廟拾金歲計積累煥然新之實我

朝尊師重道之大典

臣鵬

奉行之而罔敢墜敢曰

貪天之功戟門東舊有名宦祠元明僅得茂宰
九人司教一人循良方正蓋如斯其難爾會

本朝兩江總督前直隸巡撫清端于公相國前且
隸巡撫商邱文康宋公流風俎豆三輔洵人士
請暫寄主於廟洵宰彭鵬作而言曰非禮也禮

不敢以名宦先啟聖公先賢祠立祠置主且姑
待之時商邱賢公子牧翁先生爲通永觀察甚
敬屬吏語今自啟聖下逮鄉賢次第位置矣名
宦誼不敢後祠成文康清端二公請入祀并前
直隸總督朱公李公巡撫格公亦如他邑皆置
主是歲庚午五月二日

皇上特簡天下有司四人

臣

鵬第一聞

命盥沐謁文廟誓曰異數何以堪此由茲一言一行
稍與宰洵殊子孫世世不得入黷序七月辭廟

出臨洵四顧宮墻久雨土壤乃覓匠計方圓百五丈以磚易土念義學師蕭英貧士也居無家代營五楹蔽風雨爲英世有又念學博王君賃署去學遠庀材構四楹憇王君從者臨行洵人士請一言以風有位鵬聞之感然曰六年宰洵當降調鐫秩者多矣若非

特旨破格留任宰早去洵矣又何能爲以是感高厚之恩久幸處此竭此涓埃後之視今其亦知所勸勉也夫因質而記之壽諸石

重修碧霞元君祠碑記

余學昌

泰山元君祠徧天下郡邑歲時祝釐士女奔走由來舊矣洵邑北關之祠脩建於

大清定鼎之十年孟邑侯斯守尉實倡之紳士商民共勦之朱進士碑記具在可考而知也余以康熙二十年來宰洵邑治民事神惟宰職任甫下車徧謁諸神廟類多風雨不蔽詢之知爲十八年地震重災民居與神祠俱毀今甫二歲鴻雁未集何由撤神廟而不建諸用是籌所以輯吾

民卽思所以安吾神第邑當孔道皇華絡繹日
不暇給奚以率士庶而新神宇閱二年穀登民
樂由是謀經始誌落成查升居歆此余在河兩
載中所藉手以無怨恫於神靈者而元君祠亦
得以觀厥成未幾以讀禮去任未及勒請貞祇
今余復補洵鄰平邑平去洵四十里而近洵士
女猶在余懷况神明之在上乎

元君神主繼嗣司死生俾吾民之瓜瓞緜緜眉壽
無害者皆吾民之積德累行神明不欺自能克
昌厥後而壽算悠長也寧必入祠而始生其畏
悔之心哉是爲記

地震記

任 塾

康熙十八年己未七月二十八日巳時余公事
畢退西齋假寐若有人從夢中推醒者視門方
扃室內間無人正恹恍間忽地底如鳴大礮繼
以千百石礮又四遠有聲儼數十萬軍馬颯沓
而至余知爲地震蹶然起見窓牖已上下簸蕩
如舟在天風波浪中跣而趨屢仆僅得至門門

啟門後有木屏余方在兩空間砉然一聲而屋已摧矣梁柱衆材交橫門屏上堆積如山一洞未滅頂耳牙齒腰肱俱傷疾呼無聞者聲氣殆不能續因極力伸右手出寸許兒鑿輩遍尋余望見手指動搖亟率衆徒木畚土食頃始得出舉目則遠近蕩然了無障隔茫茫渾渾如草昧開闢之初從瓦礫上奔入一婢指云主母在此下掘救之氣已絕慟哭問問兒鑿弟奎云汝輩幸無恙餘三十口何在答云在土積中未知存

亡乃俯而呼有應者掘出之大抵床几之下門戶之側皆可賴以免其他無不破臚折體或呼不應則不救矣正相對莫知所以忽聞喧噪聲云地且沉爭登山緣木而避蓋地多拆裂黑水兼沙從地底湧泛有騎驢道中者隨裂而墮了無形影故致人驚駭呼告耳頃之又聞呼大火且至乃傾壓後竈有遺燼從下延燒而然急命引水灌之旋聞劫棺槨奪米糧紛紛攘攘耳無停聲因扶傷出撫循茫然不得街巷故道但見

土礫成邱屍骸枕籍覆垣欹戶之下號哭呻吟
耳不忍聞目不忍睹歷廢城內外計剩房屋五
十間有半不特栢梁松棟倏似灰飛卽鐵塔石
橋亦同粉碎登高一呼惟天似穹廬蓋四野而
已顧時方暑歸謀殯孺人覓一裁工無刀尺一
木工無斧鑿不得已爲暫藁埋畢舉家至晚不
得食髣髴厨室所在疏之獲線麪一筐煮以破
甕底盛以水筒各就啖少許次日人報縣境較
低於舊時往勘之西行三十餘里及柳河屯則

地脉中斷落二尺許漸西北至東務里則東南
界落五尺許又北至潘各庄則正南界落一丈
許闔境似甌之脫壞人幾爲魚鱉豈惟陵谷之
變已耶八月初一日鑿儀衛沙必漢奉

上諭着戶工二部堂官一員查明具覆施恩拯救閣
臣會議具請奉

旨着侍郎薩穆哈去初六日薩少農到縣散賑城廂
窮民五百二十九戶十六日戶部主事沙世到
縣散賑鄉村窮民九百四十一戶戶各自金一

兩十八日又傳

旨通州三河等處遇災壓死之人查明具奏九月十五日工部主事常德筆帖式武寧塔到縣散給壓死民人旗人男婦大小共二千四百七十四名口又無主不知姓名人二百三名口內孩幼不給旗民死者另請

旨並無主不知姓名地方官料理外將壓死男婦一千一百六十八名口人給棺殮銀二兩五錢伊親屬具領訖又先是八月初九日

上諭通州三河等處地震重災地方分別豁免錢糧具奏隨奉巡撫金 查明三河平谷最重香河武清寶坻次之薊州固安又次之最重者應將本年地丁錢糧盡行蠲免次者應免十分之三又次者應免十分之二具疏題奏奉旨依議三河地丁應得全蠲欽哉

皇恩浩蕩如海如天民始漸得策立骨月相依其不幸至於流離鬻賣者十之一二而已計震所及東至奉天之錦州西至豫之彰德凡數千里而

三河極慘自被災以來九閱月矣或一月數震或間日一震或微有搖抗或勢欲摧崩迄今尚未鎮靜備閱史冊千古未有不知何以致此雖然九水七旱天所見于堯湯之世者豈關人事哉

邑侯莆田彭公生祠記

胡繼芳

公宰洵六年以

特簡天下有司第一奉

命入京將啟行吾儕焚香挹水遮道卧轍我公單騎

夜出南門平明至潞吾儕思且慕建祠邑署東

祠成額曰洵邑真父母莆田彭公生祠僉曰公

是行也吾儕嘗詣

闕乞留有清慈仁義公明勤樸八真之狀已樹之石復書之額誠不可以無記邑人胡子繼芳秉筆伸紙聽輿人之言曰我公敬士崇儒以斯文爲已任

文廟漂搖僅三楹公次第新之無缺典未嘗募一銖罰一錢又設義學置延師膳田二頃餘正供代

辦以興多士春秋糧未嘗設一卯比一役而火
耗雜費悉革之並列入納票內以爲例又曰我
公寧人息訟據理剖決從無罰一粟一銖歲終
催報贖緩則云三邑自無地丁歲終計費七十
金舊例也我公云使民苦寧使官苦悉自捐一
切派累下車卽除驛馬芻料平如民價從無加
稱淋斛人命坐真兇株連不問盜案非賍明証
確者不坐昔東省與直隸讞賊藉公會訊得白
馬蘭兵民爭地藉公質成得明通潞武清水旱

口北饑荒藉公勘且賑其他附會銷案被誣得
釋獄成平反雖他邑事歲有數十人何況洵邑
之賴吾父母也又曰保甲行而尊視長弭盜詰
奸出於此然少不善而流弊亦甚吾公分邑爲
八路十五鄉命名親睦禮讓仁義忠信嘗云願
爾曹顧名思義設守望樓八百處樓下樹旗書
守望相助傳鑼接應八字頌之數年內槩無縣
役下鄉鷄犬不驚盜賊潛踪夜扉不闔又曰我
公強項如鐵絕不逢迎值禱雨有上官經過索

魚肉叱而去京北差役咆哮立命褫其衣將置
諸法骨鯁多此類故事墊道飲食若流我公謂
此民脂也不以供億由是內外雅重清名槩無
所取一日道上饋大司空蘇公豚肩卮酒蘇公
嘆曰食爾饋吾心何忍然爾三河縣酒清且苦
與諸司嘗一口足矣命傾一卮衆嘗不及遍至
今邑中傳爲佳話又曰我公寒不坐乘暑不張
蓋布衣疏食有寒素所不堪者日用悉現錢平
買嘗云儉以助廉而誼敦古處樂與人善同城

白守戎歿治材爲殯送其靈輜及夫人穉子至
舟吾邑有故儒曹持裕妻張氏十七孀湮沒不
彰公詳請建坊其治已治人悉以直道正氣格
天及物嘗題內署自勗云酌水心如雪災香誓
告天蓋紀實也是以上邀

聖眷屢荷異數各憲交章特薦且曰善政善教難以
枚舉吾儕欲以數尺貞珉括之不亦難乎繼芳
敬聆輿論筆而榜其畧公諱鵬字兼山福建莆
田縣人累世清白名宦庚子鄉薦甲寅閩變拒

偽三年絕粒毀形忠節最著宰三河清正循卓

蒙

召見

賜金三百以各案降十三級議調議削俱

特恩從寬留任康熙二十九年五月奉

旨行取為御史臺今候補內府給事中

重新洵署舊額記

彭萼采

乾隆庚申春三月夏邑彭萼采來蒞三河署多

茅椽署西一小楹傾欲圯命工整之於塵土中

見舊額字多磨滅灌以水見其上有宋文康公

訓屬格言宋冢宰公重新懸額檄飭家大中丞

兼山先生所作格言記萼采拜而讀之其宋文

康公之訓屬日報朝廷某事榮父母某事實百

姓幾分留十孫幾分其冢宰公檄飭曰此先相

國文康公於國初開府畿東時訓屬格言也迄

今四十餘年懸額猶存字多漫漶榮奉

簡書復觀察茲土言念先澤水淵益凜爰行重新彰

諸廳事蓋自勉以期共勉云家大中丞記曰丙

寅春三月通永觀察宋先生以重修懸額勸飭
寅箴檄畿東所屬州邑頒以式大書二十字細
書八十四字檄至洵如式懸邑署洵宰彭鵬升
堂入座日所覲面退而思曰報者如答榮者無
忝寬者弗亟留者有餘而况所邀者朝廷之爵
祿也所遺者父母之體膚也所供者百姓之筋
血也所培者子孫之元氣也非報斯負非榮斯
辱非寬斯竭非留斯覆語曰一命之士施及三
黨可不思報孝經曰立身行己揚名顯親可不

思榮孟子曰用其一緩其二可不思寬易曰積
善之家必有余慶可不思留吏不思愛百姓因
而欺朝廷玷父母累子孫吏惟思長子孫遂致
剝百姓負朝廷辱父母成我者君也我生者親
也百姓者我所受於君也子孫者我所傳於親
也思報思榮思寬思留作者文康之詞也述者
觀察之心也遵而懸之者畿東屬吏也筆而記
之者洵宰彭鵬也藁采讀罷喜甚急新之懸諸
廳敬識於後曰相國宋文康公書此格言令子

冢宰公復纘承之家中丞公令三河時記於座上其姪萼采復敬守之相國爲鄉先賢中丞乃伯氏行也嚮慕往哲景仰宗風維日三省儼如在上丙寅迄今庚申五十有五年矣前正典型昭垂宇宙字裏行間心跡雙清後之官茲土者尙其升堂入座常日存此二十字

序文

颶邑侯任鶴峯修學紀事詩序 龍 燮

及鶴峯令洵陽垂五載屢欲訪之未暇也今

年秋奉

召入 都客有攜鶴峯詩集者余讀其修學紀事排律幾如監門之圖畫使人腐心蕩魄竊嘆洵陽距京師僅百里儼然左輔邑雖敝豈遂至此毋亦昔人所謂詩人類多謊語者乎迨策馬而東過其郊入其邨登其堂乃恍然曰詩中所謂荆榛瓦礫與夫連薨就圯者蓋爲鬻序溯厥始也今觀蕭條署齋亦可與詩所云云相証矣然鶴峯之意與自豪神采愈旺間與之剪燭論文

三河縣志 卷十五 三
署門外擗鼓如雷鶴峯惟以談笑應之余間嘗
竊窺其胸次又實有居其職則思盡其事也者
暇日偶步城隅忽有殿宇參差頗巍煥駐足瞻
視間同游指曰此邑之學宮也自明季寇氛以
來蕩爲劫灰委於茂草久矣今賴我令公捐貲
締造益宏舊觀余捫衣而進仰視椽桷周覽堂
堦見夫金碧之輝煌規模之壯麗益驚異久之
今世之作吏者惟簿書期會是問猶鹿鹿無寧
晷卽間有興作不過繕招提爲福利之緣飾臺

榭供游觀之具視此儒宮一畝直不啻秦越然
矣今鶴峯向榛蕪瓦礫中丕新學校巍然翼然
有若蛟龍虛而鸞鳳峙此豈區區補苴罅漏者
比哉一日鶴峯出修學紀事詩示余其中鋪叙
詳整錘鍊精工如大匠造未央宮雖萬戶千門
而次第秩然不亂此種手筆殆少陵以後所絕
無而僅有者雖然詩之美余疇曩已心識之余
身履其境復誦其詩尤欲我鶴峯急梓而傳之
俾四方知疲敝如三河而官於此者意在興廢

河東志 卷十五
舉墜尚能作此泮宮媲美魯侯則凡守土之吏
誠能殫心竭力仰體

聖主宵旰求治之心盡其猷盡其念有不難登至治
於邳隆者鶴峯其殆將進歌風而作雅也已

祭蝗文

嗟乎爾族姓著於周也曰螽斯春秋書爾之生
也曰蝻曰隸書無年而詩又曰爾蝻蝻蝻蝻田
祖有神秉畀炎火今爾之人吾境也歲荒甚百
穀不登了不得食卽有萌株爾之所過亦不忍

蒿蕪而盡之然爾終不以不入境而使吏有偶
然之幸也吏亦無祈於爾而自欺飾以竊附於
古之九江中牟誣爾散且避夫以境內荒不得
食而爾似有仁心螟未嘗食心蟊未嘗食葉蝻
未嘗食根賊未嘗食節而吏又無所祈無所附
幾幸爾入而復出皇皇祭爾何爲哉吏之祭爾
也閔爾也洵民婦子饑不堪命草根木皮竭矣
日尋爾之族焙之糜之緩須臾毋死是爾未嘗
食心食葉食根食節而洵民已食爾之身爾之

子孫矣爾曷不率而去去而歸于無何有之鄉
母俾遺種於穀地又慎毋率爾類潛徙而壑諸
鄰也夫民吾胞也物吾與也八荒吾闔也爾諒
予心咸起明聽

滕城隍神文

彭鵬

本縣西南路讓一鄉七保李家新庄民李從禮
妻王氏先因染病若有鬼物附之語口稱能醫
從禮鄉民也不肯從破碗毀案無虛口村落傳
聞遠近踵至禮所以有驅除邪魔亟救妻命之

請本縣親詣該庄已鎖王氏到案而陰陽判隔
無從拘訊伏惟

尊神與本縣理幽治明共司茲土者也方今

聖主當陽普天率土其鬼不靈屬在輦轂尤難遁形
合將王氏牒送案下迅行拘質緣何依附治罪
申法本縣治洵五載疾惡鋤奸于人無少貸彼
爲草木之妖應知薑桂之性如屬狐狸之類當
爲豺虎之投并祈嚴飭速去毋使支飾尚懸戀
此方爲也

歲旱祭風伯文

彭鵬

屬者長子殷雷密雲不雨下土之民咸謂風以散之是雲雷有憫人之意而風伯操撓物之權吏不能爲風伯解也夫不姦律不鳴條比德於君子其所以體上天仁生義育長養庶類功豈在雲雷下氓之蚩蚩第見油然而陰也疾然而震也倏然而散也遂以爲撓之散之故至此吏又不能爲風伯平也旱旣太甚亦孔之哀敢以吏之不能解不能平者祭風伯而告之勿噫勿

頽勿颯勿暴息其噫和其籟吹萬而無聲樹上有少女赫煖如故吏將率斯民匍匐而告諸天而後氓之蚩蚩亦知夫風伯之未嘗撓之散之也凡雷雨風雲之神相須而相濟易曰雷風不相悖山澤通氣然後能變化旣成萬物也又曰雲行雨施品物流形吏將爲文合雲雷雨師而祭之曰

國家歲有常祀惟雨暘時若是祈吏卽不德致干天和亦當恤民之顛連饑饉無辜而罹於罰民

即罔恤亦當昭鑒夫

聖天子爲歲爲民必誠必敬其可不思所答以侔神
羞夫神無所不宰者也膚寸之雲不崇朝而天
下雨况畿輔爲首善地乎如之何同雲出震澍
雨無聞使下民叢怨終風而使吏有不能解不
能平之嘆哉惟風伯知之

觀察盧公友竹家訓序

李因篤

古之君子令德顯猷皆肇修於家而後獻於廷
其生平踐閱深視履廣著爲勸誡非躬自蹈履
則觸於當世之前車而遂以示其後人故載之
家乘實靖獻之先資也觀察盧公素甫先生先
朝賢大夫歷官廉恕所至稱古遺直撰武庫干
秋鑑彞倫法戒錄諸書嘗進呈蒙溫綸載入史
館顧公之宦轍五逮吾秦輿論棠歌幾遍關輔
而予生也晚末由炙其餘輝竊以爲憾去夏於
郡司馬牲菴費使君座上晤公孫萬同愛其樹
品粹然問而知其家學蓋根茂者必庇其陰纘
長者必盈其緒二雅之什多出於周召尹姞之

裔可考而知也素甫先生三河人以世家擢詞
科立德立功照耀遐邇扞爲宸猷忠告已奏御
刊行矣費使君更貽予書緘先生遺篋中家訓
附四箴一冊曰萬同奉尊人小司農濟如公命
將勒石而屬予引端發而讀之言簡而義宏體
平而適用循則安而違則亂履則吉而悖則凶
脩之家而有餘施之天下而無不足比飲食之
味而嘆中庸之不可能嗟乎是先正之格言也
夫訓者上下通用之詞家訓莫如顏氏而先生
是作較中丞更質而切所當戶誦家絃奉爲歷
銘與顏文並垂不朽四箴愈朴愈典天下之藉
與天下共之豈范陽所得私哉棘人幼趨庭家
貧失學先子九經未了之書聽其淪胥今觀吾
友之堂構從之引繩樹準焉閱濟如公所識後
語懇摯悱惻弗禁流汗浹踵涕泗橫披矣若費
使君錫類之仁闡幽之義扶倫式靡負哉名冠
諸侯有以也夫

重修三河署記

余左遷通州判官之五年歲在癸卯仲春攝三河篆甫蒞任初未詳三河之所以名而縣署湫溢傾圮釐然在目矣余謂署曰公署門曰公門堂曰公堂蓋辦公之地也傾圮不治如辦公何五月奉文陞任茲土恭逢

天子展謁

祖陵幸盛京邑當其衝驛使絡繹余未遑別有營作越明年甲辰倡捐謀所以修之書役亦樂輸有差

計得白金若干兩舊制照墻距大門若干尺移
置道南去新建大門若干尺儀門舊制一間今
移舊大門三間易之去大門若干尺去大堂若
十尺東西兩角門如制大堂兩廊各設科房六
間比舊宏堅如式戒石碑久廢補立如初大門
內東爲土地祠舊祀雜妄僅留專祠如祀典西
設班房一區各班環列焉門西遙接縣獄再西
爲瞭馬廠築垣屏留洵陽驛路復舊制也東西
設坊二棹楔臨洵舊治左輔巖疆八字經始於

某年某月落成於某月某日按新唐書武德二
年析潞縣置臨洵開元四年更置三河郡邑釋
名三河以地近七渡鮑邱洵河三水名城邑考
三河舊城在今縣東三里洵河南建於石趙廢
於後魏今之三河城卽趙德均所置水經注洵
河源出北山東南經平谷縣故城西而東注於
洵河考三河志洵水卽錯河一名七渡河洵水
卽錯河之支河平時乾涸霖雨成河鮑邱河自
順義入境至時管營始有河形每遇霖雨積水

成河夫源遠流長者河也七渡是也忽盈忽涸者行潦也洵與鮑邱是也行潦不可以爲河洵與鮑邱豈得與七渡並稱三河耶且置邑命名往往本諸山川義取切實如五臺以臺名三水以水名確有其數而因以得名之類是也以河名矣亦奚取於無源之行潦而附會以名三河耶及考三河輿圖七渡河自青陽屯入境南流由舊城西北繞城而東而南而西而東南至料馬庄出境形若半璧而舊城適當其缺故云然則以三面環河名三河可謂地近七渡鮑邱洵三水則不可也水經注謂洵水出右北平無極縣西山鮑邱出禦爨北塞者豈陵谷變遷今昔不同歟抑鄙未經其地而以訛傳訛歟余旣重修三河署而因辨其命名之義俾後之君子知所考云知縣事臯蘭李炳記

三河縣志卷之十六

三河縣志卷之十六

藝文志下

雜著

戊午九月五日恭迎

聖駕奉

皇太后東幸湯泉

任塾

丹岩方望幸翠輦欲東遊別闢畬間道無妨穫

後耕從邑西北田間開道 距大道二十餘里 摳衣親洒掃相杵其

歌謳想見經過處龍文五彩浮

三河縣志 卷之十六 藝文



溫泉堪適意

大孝奉

慈宮獨捧

鑾輿穩非馳羽獵雄刊山危石徙架壑彩橋通億載應

傳記嵩呼此路中

引繩方就直注水欲觀平香草無留茁晴沙不

斷明神靈成夾扈風雨是前旌定察

慈顏喜車邊道邑名

庚午仲冬東謁

皇陵回都宿三河題壁

鎮國公 失名

客舍雞聲早寒林宿鳥啼覺來尋好夢曉月照

窻西

修學紀事

任塾

帝城開北極洵邑處東偏左輔長環衛雄關本

接連郭遺唐晉制星應尾箕躔首善風先被多

文俗未遷餘風留白恰故物有青瑣人解親墳

典家爭習管絃芹宮氣鬱鬱槐市路平平揖讓

章縫內雍容簋簋邊儒言傳習省聖教服膺拳

蟾月三秋步鵬雲萬里騫登朝誇玉笋歸院詫
金蓮不謂妖氛起那知殺氣纏亂兵駢白刃烈
火縱炎烟廢里荆榛長遺區瓦礫填師儒星落
落巖序草芊芊砌沒迷行道墻傾改幅員連蔓
俱就圯一木曷扶顛乘喜牛羊茁墉嗟鼠雀穿
旁風吹座近中月落庭圓蟲螿編鐘簾狐眠舍
菜筵寒兵燒檻木醉豎枕臺磚委地松三尺支
門石一卷鶉衣方旅進鶴髮漫踟躕講肆那容
勝齋居僅伏除每愁瘞土壤遑問潔牲牲飽逸

惟紈袴塵蕪在硯田舞空悽墜蝶歌斷咽寒蟬
自愧循良日方司率迪權新硯將曷諉舊貫可
仍沿畫版中間架持籌計貨泉蕭齋安敗壁偃
室任摧椽親友分裘服妻孥減粥館選才宜委
幹鳩匠勿辭胼事豈三銖就功非一簣諉鳴鐘
紳佩集執簿劍蓋聯服賈搯錐易爲農荷鍤使
子來趨恐後義助躍俱前入谷勤斤削依山廣
埴埏甃師陶侃運石問祖龍鞭頭屑俱無棄肱
肩乃盡駢旣資羣力舉如積衆流涓次第經營

合縈回氣脉連蜃樓雄海市仙閣幻山巔龍繞
雕梁繪螭蟠潤礎鐫穹碑兼屬曩麗勝儼璣璇
主易師稱正龕存配位全巍峩增氣象美富表
文宣几席東西設賁鏞左右懸方臺平若水甬
道直於弦從我分行侍私諸兩翼翩其間鍾五
百厥後則三千列戟牙如指蹲獅峙比肩橋堪
圓聽賭池豈任淤填喜有清流注毋爲俗說牽
密頻浮半壁文藻躍三鱸莫莫宜供采依依可
告虔尼山當月禱泗水迄今延祀並因親起祠

尊教孝先服官稱宦業在里靈鄉銓亦有餘蘊
及俱從聖澤綿紫薇攀桂接太乙照藜燃條爾
魁光逼超然帝座專仰瞻知有在肄習更無愆
榻穩臯比龔堂高絳帳寧明倫三代共端本百
王然百堵隨馨鼓層欄象蜿蜺虛櫺通日御別
園引靈輶桃李堪成徑榭楠欲覆阡禮門同出
入學圃具周旋奕奕先生號魚魚弟子員前規
行有陷遺器捧無蹟旦夕鳴笙磬春秋職豆籩
豆金歸冶鑄瓦礫並陶甄俗化青衿美人歆玉

樹妍信知興禮樂端已靖戈鋌覓暇携琴過隨
端舉義詮雅辭消鄙倍別解破拘攣一日毋吾
長多生共爾緣宵衣

天子聖東閣幸臣賢丹筆圖嚴日黃金買駿年材原
需杞梓芳不掩菘荃惟學終為貴欽哉盍勉旃

午日與白荆輝

冉德

熏風拂檻雨新晴好泛蒲觴思對兄坐飲良朋
忘酒債窮愁佳節逼詩成庭前徒愧懸魚缺門
上何須艾虎橫明日不嫌魚雅設還來挹水賦

嚶鳴

題曹節婦碑後

彭鵬

曹家甲第昔雲連不辨今誰牧馬眠刺得婦貞
傳片石行人還有話當年

劉頓齋遺集被焚賦以誌感

胡任輿

漢代人文重蔚宗等身著作老虬松千秋未許
窺斑豹一炬俄教付祖龍卷帙半隨烟霧散英
華猶並露雲濃只今令子揚前烈手澤頻應起

孝恭

公名瑞遠次子
繼觀字靈溥

劉顛齋遺集被焚賦以誌感

顧悅康

彭城聲譽著清時素行

賢王足表師蠹簡蝕仙經術富著書充棟鬢毛衰
他年不信亡三篋此日誰能補什詩却似祝融
愛墨寶長留夏五郭公疑

題咏

重宿華山題壁

董誥

又到青峯頂山靈喜客來重尋精舍榻還把落
霞杯雨過幽禽靜窓隨倦眼開悠然圖畫裡一

夕遠塵埃

甘泉寺

奚祿詔

馬踏雲根石磴斜山腰抱處有僧家三峯塔外
懸酣日萬木叢中隱雜花殘燒尚餘唐院落定
香空謝梵袈裟甘泉悔作楊雄賦回首荒城聽
晚笳

過錯橋作

劉希彥

見名勝志

錯橋臨七渡山色繞河陽地脉沿溪潤春波到
海長河容開麗景樹影弄晴光川上情何極東

遊憶故鄉

渡三河詩

呂 高 見江
峯集

日馬渡三河春風起綠波天圍燕樹合山繞漢
宮多落電流弓影青雲過劍歌邊烽方欲息吾
待問魚簞

宿錯橋作

宋 裴 見燕
石集

偶來城下錯橋西神樹栖鴉迫暮啼數騎東來
飲河水一聲羌笛碧雲低

遊滿井

袁宏道

出東門子城古通三五折破石蹶荒邱云是故
元碣燒柳發柔條卧槎吐紅節石溝注涓水寒
鑑寫空潔燕女競遊驪羅襪帶香雪梅花堆箭
髻波影動文纈青山酣遠客新鳥困啼舌紅塵
來頻頻可消奔馳熱

蚤發蘆溝橋百里至孤山口

姜宸英

日出亂烟霧崇崗互迴伏雞鳴指前村數家連
山足朔氣何茫茫草短狐兔逐東望漁陽塞西
眺燕山麓五季昔交訂游居非一族此地即戰

三河縣志 卷一
場舊事滿陵谷窄逕沿洞溪兢陵渡馬腹孤山
忽在眼近寺露深屋僧野少逢迎碑殘試捫讀
中堂一燈靜戶外羣峯蠹月漏白松頂清光了
可掬卽事多所歡誰能眠出縮山風打牕櫺夜
闌酒更續

止孤山普濟寺

朱彝尊

曉辭盧溝河暮踰韓姑砦荒榛取綫路亂塢湧
東界峯迴削峒吸水涸失涔派啞啞饑鳥集
斂病葉敗返景寒易收陰崕瞑愈怪俄而樵歌

歇近寺響僧咽言投水晶域栖止得所屆山瓶
溫凍釀冬窄出秋菜坐久霜月高起行猶未憊
逍遙青松陰於心豈不快

題臨洵八景

邑令任塾

稻畦荒圃似江南爲有流泉出地甘石漱干珠
寒雨落山圍一鏡碧天涵浣來衣冷和秋月汲
處瓶香帶夕嵐安得鑿渠通郭繞不煩符調及

僧庵

靈泉漱玉

山骨嶙峋啟半圭
涓涓石乳挾青泥
疎河導脈纔成竇
亂草藏流不滿溪
潤入華池誇玉液
冷傾銀海勝金甌
一瓶歸待烹香茗
卻畏山靈不敢攜

聖水流丹

晴曉人依渡口船
水光極目渺無烟
風催玉杵還成穀
日浴晶盤不定圓
飲犢乍沉波漾漾
戲鴻初下影娟娟
人間自有明河派
惆悵難令鳥

鵲填 七渡晴瀾

走兀纔能占一邱
更無培塿漫夷猶
祇看峯翠

生空際遙揖烟青
在別州嶺半鶴歸
松杪迥洞邊猿守
石門幽捫蘿我欲
登縹緲四望平原
綠

滿疇 孤峯挺秀

蓼花菰葉滿迥塘
暮鴈參差落影長
倉火照來還顧語
漁歌驚斷不成行
身隨一抹孤打月
夢待三更兩岼霜
點破蒼茫秋色動
畫圖何處是

瀟湘 南塘落鴈

層山落日漸成霞
樵客呼羣類麇麇
風動草衣隨返犢
月明莎笠亂歸鴉
行歌響入疎林近
荷

三河志 卷一 九
擔行分小徑斜已傍疎籬漫回首蒼蒼舊路暮
雲遮 北兎歸樵

翠滴春山暄景臨片雲觸石起無心陰移漠漠
過丹壑白照粼粼映碧岑漸覺中天能捧日卽
看遍宇欲爲霖岩間仙客飄飄影鶴背應知濕

滿襟 陀嶺春雲

澹蕩秋池白鳥依雪毫點綴碧雲機泥中引子
穿荷路月下啣魚立釣磯人影過橋驚暫起山
光入鏡照斜飛晚烟近浦霜華過一一圓沙宿

處歸 月池秋鷺

陳基

巖流銀漢脉靈液激成川誰琢一痕玉能通三
面泉法雲噓絕壁驟雨瀉晴天所冀穿渠逼常
滋郭外田
何年留聖水此地有泉流隔膜金篋啟新壺玉
液浮丹鑪融遠嶂乳竇滴清秋靜聽泠泠韻還
當豁兩眸

渡口光搖碧晴波瀲灩寬斷橋依落日釣艇動

三河縣志 卷一
微瀾渚荇沉陰細林花入澱寒依稀瀧七里擬
拂子陵竿

孤嶽亭亭峙高占秀色空平疇鋪遠水老樹走
清風雨浥苔層綠霞歸澗山氣紅河當凌絕頂一

望薊門通

陀嶺疑膚寸騰空勢莫攀無心遙出岫有用不

藏山擁日青梁口爲霖綠墅間閒等坡老句好

作撻雲還

坡公有撻雲篇常云行秦棧中見石
罅間烟氣如縷行人衣袖中皆雲也

樵罷興歸思山風動笠篲徑開紅樹杪擔荷白

雲多犢返烟縈野雞栖日下坡惟聞橫笛吹先

後起清歌

旅鴈驚寒早迴翔落晚塘菰花江月白香稻澤

田黃影寫清秋色聲聯紫塞行漁歌催陣起歸

夢繞洵陽

一片秋池月風光自鳥依清姿爭著潔瘦影不

添肥氣爽雲生翼波平鏡舞衣爲憐沙水淨久

立共忘機

論曰太史公有云載籍極博又云擇言尤雅是

知欲言之雅馴惟博而後能擇也三河爲畿左
衝衢當明季蹂躪之時名人著述大半遺佚而
又素無刻志蒐輯無人當時縹緲卷帙蝕於兵
燹者半蝕於風雨者又半求其斷簡殘編且不
可得又安得博考而擇之也雖然旁搜遐攬藝
文雖僅數篇而或有裨風化或有利民生率皆
窮智究慮玉潤珠輝其餘或紀名勝或誌名賢
有地以文傳者有人因地傳者要亦可以知人
可以觀政誰謂約之精非言之雅者哉

